

❏ ছালাতুর রাসূল (ছাঃ)

বিভাগ/অধ্যায়ঃ ছালাতুর রাসূল (ছাঃ) (صلاة الرسول ﷺ)

রচয়িতা/সঙ্কলকঃ ডঃ মুহাম্মাদ আসাদুল্লাহ আল-গালিব

৯. রাফ'উল ইয়াদায়েন (رفع اليدين)

এর অর্থ- দু'হাত উঁচু করা। এটি আল্লাহর নিকটে আত্মসমর্পণের অন্যতম নিদর্শন। [94] রুকু থেকে উঠে ক্বওমাতে দাঁড়িয়ে দু'হাত ক্বিবলামুখী স্বাভাবিকভাবে কাঁধ বা কান বরাবর উঁচু করে তিন বা চার রাক'আত বিশিষ্ট ছালাতে মোট চারস্থানে 'রাফ'উল ইয়াদায়েন' করতে হয়।

(১) তাকবীরে তাহরীমার সময়

(২) রুকুতে যাওয়ার সময়

(৩) রুকু থেকে উঠে সোজা হয়ে দাঁড়াবার সময় এবং

(৪) ৩য় রাক'আতে দাঁড়িয়ে বুক হাত বাঁধার সময়। এমনিভাবে প্রতি তাশাহুদে বৈঠকের পর উঠে দাঁড়াবার সময় রাফ'উল ইয়াদায়েন করতে হয়।

রুকুতে যাওয়া ও রুকু হ'তে ওঠার সময় 'রাফ'উল ইয়াদায়েন' করা সম্পর্কে চার খলীফা সহ প্রায় ২৫ জন ছাহাবী থেকে বর্ণিত ছহীহ হাদীছ সমূহ রয়েছে। একটি হিসাব মতে 'রাফ'উল ইয়াদায়েন'-এর হাদীছের রাবী সংখ্যা 'আশারারে মুবাশ্শারাহ'[95] সহ অনূন ৫০ জন ছাহাবী[96] এবং সর্বমোট ছহীহ হাদীছ ও আছারের সংখ্যা অনূন চার শত। [97] ইমাম সুয়ুত্বী ও আলবানী প্রমুখ বিদ্বানগণ 'রাফ'উল ইয়াদায়েন' -এর হাদীছকে 'মুতাওয়াতির' (যা ব্যাপকভাবে ও অবিরত ধারায় বর্ণিত) পর্যায়ে বলে মন্তব্য করেছেন। [98] ইমাম বুখারী বলেন,

لَمْ يَثْبُتْ عَنْ أَحَدٍ مِنْهُمْ تَرْكُهُ. وَقَالَ : لَا أَسَانِيدَ أَصَحَّ مِنْ أَسَانِيدِ الرَّفْعِ-

অর্থাৎ কোন ছাহাবী রাফ'উল ইয়াদায়েন তরক করেছেন বলে প্রমাণিত হয়নি। তিনি আরও বলেন 'রাফ'উল ইয়াদায়েন'-এর হাদীছ সমূহের সনদের চেয়ে বিশুদ্ধতম সনদ আর নেই'। [99] রাফ'উল ইয়াদায়েন সম্পর্কে প্রসিদ্ধতম হাদীছ সমূহের কয়েকটি নিম্নরূপঃ

(১) আব্দুল্লাহ ইবনে ওমর (রাঃ) বলেন,

أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ كَانَ يَرْفَعُ يَدَيْهِ حَذْوَ مَنْكَبَيْهِ إِذَا افْتَتَحَ الصَّلَاةَ وَإِذَا كَبَّرَ لِلرُّكُوعِ وَإِذَا رَفَعَ رَأْسَهُ مِنَ الرُّكُوعِ... مُتَّفَقٌ عَلَيْهِ، وَفِي رِوَايَةٍ عَنْهُ : وَإِذَا قَامَ مِنَ الرُّكُوعَيْنِ رَفَعَ يَدَيْهِ.... رواه البخاري-

'রাসূলুল্লাহ (ছাঃ) ছালাতের শুরুতে, রুকুতে যাওয়াকালীন ও রুকু হ'তে ওঠাকালীন সময়ে..... এবং ২য় রাক'আত থেকে উঠে দাঁড়াবার সময় 'রাফ'উল ইয়াদায়েন' করতেন'। [100] হাদীছটি বায়হাকীতে বর্ধিতভাবে বর্ণিত হয়েছে যে, 'এভাবেই তাঁর ছালাত জারি ছিল, যতদিন না তিনি আল্লাহর সাথে মিলিত হন'। অর্থাৎ আমৃত্যু তিনি রাফ'উল ইয়াদায়েন সহ ছালাত আদায় করেছেন। ইমাম বুখারীর উস্তাদ আলী ইবনুল মাদ্বীনী বলেন, এই হাদীছ আমার নিকটে সমস্ত উম্মতের উপরে 'হুজ্জাত' বা দলীল স্বরূপ (حُجَّةٌ عَلَى الْخَلْقِ) যে ব্যক্তি এটা শুনবে, তার উপরেই এটা আমল করা কর্তব্য হবে। হাসান বহরী ও হামীদ বিন

হেলাল বলেন, সকল ছাহাবী উক্ত তিন স্থানে রাফ'উল ইয়াদায়েন করতেন'। [101]

(২) মালিক ইবনুল হুওয়াইরিছ (রাঃ) বলেন,

أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ كَانَ إِذَا كَبَّرَ رَفَعَ يَدَيْهِ حَتَّى يُحَازِيَ بِهِمَا أُذُنَيْهِ، وَإِذَا رَكَعَ رَفَعَ يَدَيْهِ حَتَّى يُحَازِيَ بِهِمَا أُذُنَيْهِ، وَإِذَا رَفَعَ رَأْسَهُ مِنَ الرُّكُوعِ فَقَالَ سَمِعَ اللَّهُ لِمَنْ حَمِدَهُ فَعَلَ مِثْلَ ذَلِكَ، رَوَاهُ مُسْلِمٌ۔

‘রাসূলুল্লাহ (ছাঃ) যখন ছালাতের জন্য ‘তাকবীরে তাহরীমা’ দিতেন, তখন হাত দু’টি স্বীয় দুই কান পর্যন্ত উঠাতেন। অতঃপর রুকুতে যাওয়ার সময় ও রুকু হ’তে উঠার সময় তিনি অনুরূপ করতেন এবং ‘সামি‘আল্লা-হু লিমান হামিদাহ’ বলতেন’। [102]

উল্লেখ্য যে, শত শত ছহীহ হাদীছের বিপরীতে তাকবীরে তাহরীমা ব্যতীত বাকী সময়ে ‘রাফ’উল ইয়াদায়েন’ না করার পক্ষে প্রধানতঃ যে চারটি হাদীছ পেশ করা হয়ে থাকে, তার সবগুলিই ‘যঈফ’। তন্মধ্যে হযরত আব্দুল্লাহ ইবনে মাস‘উদ (রাঃ) বর্ণিত হাদীছটিই সর্বাধিক প্রসিদ্ধ। যেমন আলক্বামা বলেন যে, একদা ইবনু মাস‘উদ (রাঃ) আমাদেরকে বলেন,

أَلَا أُصَلِّي بِكُمْ صَلَاةَ رَسُولِ اللَّهِ صَلَّى اللَّهُ عَلَيْهِ وَسَلَّمَ؟ فَصَلَّى وَلَمْ يَرْفَعْ يَدَيْهِ إِلَّا مَرَّةً وَاحِدَةً مَعَ تَكْبِيرَةِ الْإِفْتِتَاحِ، رَوَاهُ التِّرْمِذِيُّ وَابُودَاوُدَ۔

‘আমি কি তোমাদের নিকটে রাসূল (ছাঃ)-এর ছালাত আদায় করব না? এই বলে তিনি ছালাত আদায় করেন। কিন্তু তাকবীরে তাহরীমার সময় একবার ব্যতীত অন্য সময় আর রাফ’উল ইয়াদায়েন করলেন না’। [103] উক্ত হাদীছ সম্পর্কে ইবনু হিব্বান বলেন,

هَذَا أَحْسَنُ خَبَرٍ رَوَى أَهْلُ الْكُوفَةِ فِي نَفْيِ رَفْعِ الْيَدَيْنِ فِي الصَّلَاةِ عِنْدَ الرُّكُوعِ وَعِنْدَ الرَّفْعِ مِنْهُ، وَهُوَ فِي الْحَقِيقَةِ أَضْعَفُ شَيْءٍ يُعَوَّلُ عَلَيْهِ، لِأَنَّ لَهُ عِلَلًا تُبْطِلُهُ۔

‘রাফ’উল ইয়াদায়েন’ না করার পক্ষে কূফাবাসীদের এটিই সবচেয়ে বড় দলীল হ’লেও এটিই সবচেয়ে দুর্বলতম দলীল, যার উপরে নির্ভর করা হয়েছে। কেননা এর মধ্যে এমন সব বিষয় রয়েছে, যা একে বাতিল গণ্য করে’। [104]

শায়খ আলবানী বলেন, হাদীছটিকে ছহীহ মেনে নিলেও তা ‘রাফ’উল ইয়াদায়েন’-এর পক্ষে বর্ণিত ছহীহ হাদীছ সমূহের বিপরীতে পেশ করা যাবে না। কেননা

لأنه نافٍ وتلك مُثَبِّتَةٌ ومن المقرَّر في علم الأصول أن المَثْبُوتَ مُقَدِّمٌ عَلَى النَافِي۔

‘এটি না-বোধক এবং ঐগুলি হাঁ-বোধক। ইলমে হাদীছ-এর মূলনীতি অনুযায়ী হাঁ-বোধক হাদীছ না-বোধক হাদীছের উপর অগ্রাধিকার যোগ্য’। [105]

শাহ অলিউল্লাহ মুহাদ্দিছ দেহলভী বলেন,

وَالَّذِي يَرْفَعُ أَحَبُّ إِلَيَّ مِمَّنْ لَا يَرْفَعُ، فَإِنَّ أَحَادِيثَ الرَّفْعِ أَكْثَرُ وَأَثْبَتُ۔

‘যে মুছল্লী রাফ’উল ইয়াদায়েন করে, ঐ মুছল্লী আমার নিকট অধিক প্রিয় ঐ মুছল্লীর চাইতে, যে রাফ’উল ইয়াদায়েন করে না। কেননা রাফ’উল ইয়াদায়েন-এর হাদীছ সংখ্যায় বেশী ও অধিকতর মযবুত’। [106]

রাফ'উল ইয়াদায়েনের ফযীলত (فضل رفع اليدين) :

রাফ'উল ইয়াদায়েন হ'ল আল্লাহর নিকট আত্মসমর্পণের অন্যতম নিদর্শন। হযরত আব্দুল্লাহ বিন ওমর (রাঃ) বলেন, 'রাফ'উল ইয়াদায়েন হ'ল ছালাতের সৌন্দর্য (رفع اليدين من زينة الصلاة)' রুকুতে যাওয়ার সময় ও রুকু হ'তে ওঠার সময় কেউ রাফ'উল ইয়াদায়েন না করলে তিনি তাকে ছোট পাথর ছুঁড়ে মারতেন। [107] উক্ববাহ বিন 'আমের (রাঃ) বলেন, প্রত্যেক রাফ'উল ইয়াদায়েন-এ ১০টি করে নেকী আছে। [108] যদি কেউ রাসূল (ছাঃ)-এর সুন্নাতের মহববতে একটি নেকীর কাজ করেন, আল্লাহ বলেন, আমি তার নেকী ১০ থেকে ৭০০ গুণে বর্ধিত করি। [109] শাহ অলিউল্লাহ মুহাদ্দিছ দেহলভী (রহঃ) বলেন, 'রাফ'উল ইয়াদায়েন' হ'ল فعل تعظيم বা সম্মান সূচক কম, যা মুছল্লীকে আল্লাহর দিকে রুজু হওয়ার ব্যাপারে ও ছালাতে তন্ময় হওয়ার ব্যাপারে হুঁশিয়ার করে দেয়'। [110]

রাসূলুল্লাহ (ছাঃ) সিজদা থেকে উঠে রাফ'উল ইয়াদায়েন করতেন না'। [111] ইবনুল ক্বাইয়িম বলেন, ইমাম আহমাদ -এর অধিকাংশ বর্ণনাও একথা প্রমাণ করে যে, তিনি সিজদাকালে রাফ'উল ইয়াদায়েন -এর সমর্থক ছিলেন না'। [112] শায়খ আলবানী সিজদায় আল্লাহর রাসূল (ছাঃ) কখনো কখনো রাফ'উল ইয়াদায়েন করতেন বলে যে হাদীছ বর্ণনা করেছেন, [113] তার অর্থ রুকুর ন্যায় রাফ'উল ইয়াদায়েন নয়। বরং সাধারণভাবে সিজদা থেকে হাত উঠানো বুঝানো হয়েছে বলে অনুমিত হয়। ইমাম আহমাদ বলেন, রাসূল (ছাঃ) দুই সিজদার মাঝে রাফ'উল ইয়াদায়েন করতেন না'। [114]

ফুটনোট

[94] . নায়লুল আওত্বার ৩/১৯ পৃঃ।

[95] . 'আশারায়ে মুবাশ্শারাহ' অর্থাৎ স্ব স্ব জীবদ্দশায় জান্নাতের সুসংবাদপ্রাপ্ত উচ্চ মর্যাদা সম্পন্ন দশজন ছাহাবী। তাঁরা হলেন : ১. আবুবকর ছিদ্দীক 'আব্দুল্লাহ বিন 'উছমান আবু কুহাফা (মৃঃ ১৩ হিঃ বয়স ৬৩ বৎসর)। ২. 'উমার ইবনুল খাত্তাব (মৃঃ ২৩ হিঃ বয়স ৬০) ৩. 'উছমান ইবনু 'আফফান (মৃঃ ৩৫ হিঃ বয়স অনূন ৮৩) ৪. 'আলী ইবনু আবী ত্বালিব (মৃঃ ৪০ হিঃ বয়স ৬০) ৫. আবু 'উবায়দাহ 'আমের বিন 'আব্দুল্লাহ ইবনুল জাররাহ (মৃঃ ১৮ হিঃ বয়স ৫৮) ৬. 'আব্দুর রহমান বিন 'আওফ (মৃঃ ৩২ হিঃ বয়স ৭৫) ৭. ত্বালহা বিন 'উবায়দুল্লাহ (মৃঃ ৩৬ হিঃ বয়স ৬২) ৮. যোবায়ের ইবনুল 'আওয়াম (মৃঃ ৩৬ হিঃ বয়স ৭৫) ৯. সা'ঈদ বিন যায়েদ বিন 'আমর (মৃঃ ৫১ হিঃ বয়স ৭১) ১০. সা'দ বিন আবী ওয়াক্কাহ (মৃঃ ৫৫ হিঃ বয়স ৮২) রাযিয়াল্লা-হু 'আনহুম।

[96] . ফিক্‌হুস সুন্নাহ ১/১০৭ পৃঃ ; ফাৎহুল বারী ২/২৫৮ পৃঃ, হা/৭৩৭-এর ব্যাখ্যা, 'আযান' অধ্যায়-১০, অনুচ্ছেদ-৮৪।

[97] . মাজদুদ্দীন ফীরোযাবাদী (৭২৯-৮১৭ হিঃ), সফরুস সা'আদাত (লাহোর : ১৩০২ হিঃ, ফার্সী থেকে উর্দু), ১৫ পৃঃ।

- [98] . তুহফাতুল আহওয়াযী ২/১০০, ১০৬ পৃঃ; আলবানী, ছিফাতু ছালা-তিন্নবী পৃঃ ১০৯।
- [99] . ফাৎহুল বারী ২/২৫৭ পৃঃ, হা/৭৩৬-এর ব্যাখ্যা, ‘আযান’ অধ্যায়-১০, অনুচ্ছেদ-৮৪।
- [100] . মুত্তাফারু ‘আলাইহ, বুখারী, মিশকাত হা/৭৯৩-৯৪ ‘ছালাতের বিবরণ’ অনুচ্ছেদ-১০।
- [101] . বায়হাকী, মা‘রিফাতুস সুনান ওয়াল আছার হা/৮১৩, ‘মুরসাল হাসান’ ২/৪৭২ পৃঃ; মুওয়াত্তা মালেক ‘ছালাত শুরু’ অনুচ্ছেদ; ‘মুরসাল ছহীহ’, মিশকাত হা/৮০৮; নায়লুল আওত্হার ৩/১২-১৩; ফিক্‌হুস সুন্নাহ ১/১০৮।
- [102] . মুসলিম হা/৮৬৫ ‘ছালাত’ অধ্যায়, অনুচ্ছেদ-৯।
- [103] . তিরমিযী, আবুদাউদ, নাসাঈ, মিশকাত হা/৮০৯, ‘ছালাতের বিবরণ’ অনুচ্ছেদ-১০।
- [104] . নায়লুল আওত্হার ৩/১৪ পৃঃ; ফিক্‌হুস সুন্নাহ ১/১০৮।
- [105] . মিশকাত হা/৮০৯-এর টীকা (আলবানী) ১/২৫৪ পৃঃ।
- [106] . হুজ্জাতুল্লা-হিল বালিগাহ ২/১০ পৃঃ।
- [107] . নায়লুল আওত্হার ৩/১২; ফাৎহুল বারী ২/২৫৭।
- [108] . নায়লুল আওত্হার ৩/১২; ছিফাত ১০৯।
- [109] . বুখারী, মুসলিম, ছহীহ আত-তারগীব হা/১৬; মিশকাত হা/৪৪।
- [110] . হুজ্জাতুল্লা-হিল বালিগাহ ২/১০ পৃঃ।
- [111] . ছহীহ ইবনু খুযায়মা হা/৬৯৪।
- [112] . মাসায়েলে ইমাম আহমাদ, (মদীনা ত্বাইয়েবাহ : ১৪০৬/১৯৮৬, ১ম সংস্করণ) মাসআলা-৩২০।
- [113] . আলবানী, ছিফাতু ছালা-তিন্নবী ১২১ পৃঃ।
- [114] . ইবনুল ক্বাইয়িম, বাদায়ে‘উল ফাওয়ায়েদ ৩/৮৯-৯০; মাসায়েলে ইমাম আহমাদ, মাসআলা-৩২০, ১/২৩৬ পৃঃ।

Source — <https://www.hadithbd.com/books/link/?id=9206>

হাদিসবিভিন্ন প্রজেক্টে অনুদান দিন